



UKA 2015/7.1
30. september 2015
Naaja H. Nathanielsen

2016-imut aningaasanut inatsisissatut siunnersuut

(Aningaasaqarnermut Aatsitassanullu Naalakkersuisoq)

Ukiaanerani ataatsimiittarnerni oqalusserisassaq manna tikitarput pissangalluta utaqquuaannarput. Aningaasanut inatsit ukiup ingerlanerani inatsisit pingaarnersaattut oqaatigineqartarpoq. Aningaasanut inatsimmi naalakkersuinikkut siuttuusut tulleriiaarinerinik paasisaqarsoqarsinnaasoq aamma oqaatigineqartarpoq. Tamannami aamma ilumoorpoq – taannaannaanngilarli. Aningaasanut inatsimmut ilanngunneqarsimanngitsut aamma pingaaruteqarput **Ineriartorneq tunngaviusumik inunnut ataasiakkaanut tunngassuteqarpoq**

Kisitsisitaasa kisiisa isiginaveersaarnissaat eqqaamassavarput, siunissamulli takorluuinerit kisitsisinik kinguneqartitsisut isiginiassallugit. Meerartatta nunatsinni sumiluunniit najugaqartut pitsaanerusunik naligiinnerusumillu periarfissinneqarnissaannut anguniagaqarnitsinni aqut eqqortoq atorparput? Namminersortut annertunerusumik ineriartorsinnaanissaat qanoq ililluta toqqammavilersinnaavarput? Tamakku tamarmik aningaasaqarnikkut ingerlatsinitsinnut taassaannngitsumik pingaaruteqarput, aningaasanulli inatsisissatut siunnersuutigineqartumi kontot arlaanniluunniit eqqaaneqarsimanngillat. Taamaammat aningaasanut inatsisissap oqaluuserineqarnerani qimerluukkavut qaffatsilaarlugit atuakkamilu tigummissatsinni naqitat akimorlugit isiginnissinnaanerput eqqaamaniartariaqarparput.

Amerlanersaat isumaqatigiissutaapput, pingaarnert minillugit

Aningaasanut inatsimmi "ulluinnarni ingerlatsineq"-up annertuumik akuunera eqqaamasariaqarpoq. Uagut paasinninnerput naapertorlugu taakkunani amerlanertigut isumaqatigiippugut. Allaffissornerup annikillisarneqarnissaa tunngavigalugu iluarsaaqqinnissat pisariaqarluinnarnerat isumaqatigiissutigineqarpoq. Inuiaqatigiinni atugarissaarnerup tunngaviusumik ingerlanneqarnissaa, tassani eqqaallugit meeqqat atuarfiat peqqinnissaqarfillu pinngitsoorata aningaasaliiffigisariaqagatsigik aamma isumaqatigiissutaasunut ilaavoq. Tamakku tunuartaaraanni aningaasanut inatsimmi annikitsunnguit naalakkersuinikkut oqallisigisassanngorput, taakkulu iluini isummersornerit assigiinngissinnaapput.

Aningaasanut inatsimmi annikitsortaannai taamaallaat isumaqatiginngikkaanni tamakkiisumik itigartissallugu pissusissamisoornerisooq apersuuserneqarsinnaavoq. Isumaqatiginngisarli tassarpiaappat politikkikkut ingerlaneranut aalajangiisuusooq ajornartorsiuteqartoqassaaq. Eqqarsarnartoqarteqaarput Naalakkersuisut aningaasanut inatsisissatut siunnersuutaat tunuliaquttaasunit pingaaruteqarluinnartuni pineqartuni taama annertutigisumik akerlerineqarmat. Aningaasanut inatsisissatut siunnersuutip saqqummiunneqarnerata kingorna tiimerpassuit qaangiutinngitsut Naalakkersuisunut ilaasortap siunnersuut isornartorsiorpaa. Aalisarnermut Naalakkersuisup nammineq suliassaqarfinni pillugu oqaasertaliinerit nammineq sularisimasussaasani isornartorsiorpaa, tamannalu isumaqarsimassaaq Naalakkersuisup suliassaqarfimminut tunngasut atuannngitsoorsimanngikkunigit Naalakkersuisut akornanni oqaloqatigiittoqarsimassanngitsoq. Tamatuma kingorna Naalakkersuisooqatigiinni erseqqissumik amerlanerussuteqartut aningaasanut inatsisissatut siunnersuummi

immikkoortortat pingaaruteqarluinnartut arlallit akerleralugit avammut oqaaseqarput. Ammaanersiornermi oqallinnermi Naalakkersuisut siulittaasuata oqaatigaa aningaasanut inatsisissatut siunnersuutip isumaqatiginninniutigineqartarnerata nalaani allannguuteqarfigineqartarnera pissusissamisoortoq. Tamannalu eqqorpoq. Naliginnaasuunngilarli siunnersuut nammineq tunuliaqutarisaminit taama annertutigisumik aningaasaqarnikkullu politikikkut ingerlatsinikkut qitiulluinnartut pineqartillugit isornartorsiorneqarmat, pineqartormi tassaavoq attanneqarsinnaasumik akisussaassusilimmillu aningaasaqarnikkut politikkeqarneq. Inuit Ataqtigiit isumaqarpugut maanngaanniik ingerlariaqqinnissamut aqut ataasiinnaasoq. Naalakkersuisut piaarnerpaaamik partiit tamakkerlugit aningaasaqarnerput pillugu eqqartueqatigiinnissamut qaaqqusariaqarpaat 2016-mut aningaasanut inatsimmut naaperiarfissanik nassaarniassagatta aqqissuusseqqinnissallu tunngaviusut pillugit oqaloqatigiilerniassagatta. Akitsuutit tassaaginnarput aqqiigallarnelit. Sivikitsumik sunniuteqariarlutik sunniutaat peeruttarpoq. Aappaagu qanoq ilissaagut? Grønlandbankimi aktiat suli amerlanerit tunissavavut, illut suli amerlanerit tuniassavagut, akitsuutinik nutaanik nassaarniaqqissaagut? Imaluunniit assiliaq aningeq isiginialissannginnerparput iliuusissallu allannguivittussat aalajangiullugit. Ataatsimoorluta. Inuit Ataqtigiinnit taamatut kaammattuuteqarpugut.

Akitsuutit eqqarsaatigalugit neqit akitsuuserniarneqarneri Inuit Ataqtigiinnit tapersersunngilarput. Isumaqarpugut tamanna innuttaasuni pissakinnernut equngasumik sakkortuumillu eqquisussaasoq. Ikummatissanullu akitsuut pillugu akimik qaffaanissaq akuersaarsinnaanngilarput. Muliginiarparput Inatsisartuni ilaasortat amerlanerussuteqarluartut aamma taamatut isumaqartut. Taamaattumik pisariaqarpoq Naalakkersuisut Inatsisartut peqatigalugit ataatsimoortumik aqqiissutissanik ujartuinissaat tamannalu uagut angusaqarfiusumik aqqiiviginiarnissaa peqataaffigerusupparput.

Siunnerfik ersarippa?

Allaffissornerup annikillisarmissaanik pisariaqartitsineq aallaavigalugu Naalakkersuisut sulissuteqarnissaannut Inuit Ataqtigiinni isumaqataavugut. Isumaqarpugulli taamatut iliuuseqarneq sukkatsinneqarsinnaagaluartoq. Aammami imaassinnaavoq allaffeqarfiit qinikkallu qanoq inissisimanissaminnut nutaaliorlutik eqaarsarsaatersornissamut piukkunnarnerpaaunngitsut. Sunnguit sorsuillu eqqaasinnaasagut pillugit suleqatigiissitaliortarsimanerpassuit eqqarsaatigalugit allaffissorneq pillugu suleqatigiissitanik pisariaqartitsisinnaagaluarput – avataaniit isiginissinnaasunik. Isumassarsisitaanissarput pisariaqartipparput.

Ataasiaannarata oqaatigisarnikuuarput ukiuni ataasiakkaani amigartooruteqarluta ingerlanerput inooqataaffigisinnaallugu, taamaallaalli aningaasat ukioq manna atuklavut siunissami sinneqartoorutiginissaat qulakkeerneqarsinnaappat. Allatut oqaatigalugu aningaasat ima atorneqassapput innuttaasut akornanni ajornartorsiutaasunik annikillisaanernut, ilinniagaqartut amerlisarnerinut, suliffissat ilaartornerinut inuussutissarsiornikkullu periarfissat amerlisarnerinut. Suliniutinut sivikitsuinnarmik kinguneqarsinnaasunut atorneqassanngillat – imaluunniit ajornerusumik: suliniutinut allanngutaasinnaaneriniq sunnguamilluunniit ilisimasaqarfiginngisatsinnut. Aningaasanut inatsimmi amigartoorutissatut pilersaarutaasut ernumatsalluta maluginiarsimavagut. Ernumatsannitsinnut pissutaavoq naalakkersuinikkut tulleriarinerit siunissarput eqqarsaatigalugu mumisitseqataasinnaasut sumiinnerisut takujuminaatsikkatsigu. Issittumi inuiaqatigiit atugarissaartut innuttaasunut nakkaassinnaasunut ikiuinissanut piareersimatitaqartut – nutaaliorluni aallartisaanniarnernut anersaaqarluarneq – aammalu namminersortut amerliartornissaat kiisalu allaffissornikkut inuiaqatigiinnut uagutsit itunut naleqqussakkamik peqarnissaq.

Aqqissuusseqqinnerit pisariaqartut pillugit partiit tamarmik peqataaffigisaannik eqqartueqatigiinnissanut Naalakkersuisut qaaqquseqqullugit arlaleriaqaluta kajumissaarisarimavugut. Maannakkut pituttorsimasutullusooq inissisimanerput iperartariaqalerparput. Tamannalu patsisigalugu partiini naalakkersuisoqatigiinni

peqataasut akornanni Naalakkersuisut aningaasanut inatsisisissatut siunnersuutaanni pingaaruteqartutut isigineqartunut annertunerusumik tapersersuisoqarpasinnginnera ernumanartutut isigaarput. Uagut isiginnittaaserput naapertorlugu aningaasaqarnikkut, taamatullu inuiaqatigiinnut, anguniakkavut pillugit oqaloqatigiinnerusariaqarneq pisariaqartinneqartoq naqissuserneqaaqqiinnarpoq.

Pinngortitaq tassaavoq inuuniarfissarput, assigiinngitsutigut

Neriunnergim inuussutissarsiutinillu tigussaasunik suliffissanik kinguneqartitsisunik pisariaqartitsineq annertoqaaq. Siunissamimi pinngortitaq inuuniarnitsinnut sorlariuartussaavarput, ullumikkornit arlaqarnerusutigut atuinikkut. Pisuussutivut atorluassavagut, nunattalu kusanarnersua aamma atorluarlugu. Nerisassaativut qitiutillugit suliniutaasartut nuannaarutissaapput. Ilissinnut nerisassaativut atorlugit nalliuttorsiualaartitsisartusi, iganermut ilitersuusiortartusi, tunisassianik ineriartortitsisunut nammineerlusilu nioqutissiorfinnik anginngikkaluartunilluunniit aallarniisusi – qujanaq! Uparuaarusuttut oqassapput tamakku ineriartornitsinnik mumisitsisuungitsut, taamaattorli siunertalimmik ineriartornissamut tapersersueqataapput. Suliffissaqartitsipput nunattalu nerisassatigut pisuussutaannit atuilaarnerit tamarmik avataanit tikisitsinernik annikillisaataapput. Tamassumalu saniatigut takornariaqarnermut atatillugu nammineerluta pigisatsinnik sassaalliisinnaanerit pingaaruteqarluinnarput.

Nunarput kingumut aatsitassarsiorfinngormat nunannaarutigaarput. Inuit Ataqatigiit uran-isiornissamut akerliunera patsisigalugu pisuussutinik uumaatsunik atuinissamut akerliunera oqaluttualiaannaavoq. Aatsitassarsiorfiit pingaaruteqaaq, nunatta karsianuinnaanngitsoq, taamatulli aamma kommuninut pineqartunut taamatullu innuttaasunut suliffeqarfinnilu suliaqartinneqartunut. Annikitsumik pisuussutinik atuisutut suliaqarusuttut amerliartornerat aamma nunaannaarutissaavoq. Ineriartorneq taamaattoq nunatsinnut iluaqutaasussaavoq.

Aalisarneq qujanartumik maannamut aningaasaqarnitsinnut annertuumik tapertaalluurtuuvuq. Taamaattorli aalisarnerup taama annertutigisumik ingerlanneqaannarsinnaanera kialluunniit qularnaarsinnaanngilaa. Aalisagaatitta nunarsuarmi tuniniaavinni pissarsiarineqarusunnissaat ataavartumik qulakkeertariaqarparput, tamatumani MSC-mik nalunaarsuisarneq iluaqutaavoq. Aalisagaatigut piujuaannartitsineq toqqammavigalugu pisarineqartanngitsutut isigineqalissagaluarpata tamanna aningaasaqarnitsinnut ajunaarnersuartut oqaatigineqarsinnaassaaq. Tamannarpiarlu pissutigalugu aalisarnermut inatsit nutaaq isumaqatigiinnikkut atuutsilernissaa taassaannngitsumik pingaaruteqarpoq, taamatullu inatsisiliornermi piujuaannartitsinerup suni tamani toqqammavigineqarnissaa pinngitsoorneqarsinnaanani.

Nunarput kusanartorsuuvuq, partiillu tamarmiusut takornariaqarnerup ineriartortinneqarnerata tapersersortuarneqarnissaanik pingaartitsinerat tusarsaajuaannarpoq – taamaannerpami? Upernaaq manna Visit Greenland-ip suliaanut tapiissutit 1,6 mio.kr.-it sipaarneqannginnissaat partiinit amerlanerussuteqartunit ilalersorneqarpoq. Taamatut Naalakkersuisut pilersaaruteqarsimagaluarput. Sipaarutissatut peerneqarput. Siparniarnerli maannakkut ersarisseqqippoq. Visit Greenland-ip sipaarfigineqannginnissaanik Inatsisartuni kissaatigineqartoq qanoq ililluni Naalakkersuisunit sumiginnaatinneqarsinnaanersoq Inuit Ataqatigiinni paasisinnaanngilarput. Taamatuttaaq partiit naalakkersuisoqatigiinni peqataasut tamanna nipangiutiinnarlugu akuersisinnaanerat paasisinnaanngilarput. Qanoq oqaaseqarfiginiarneqarnersoq pissangalluta utaaqqimaassavarput.

Aningaasanut inatsimmi piviusut aallaavigineqartariaqarput

Akitsuutit qassiugaluarnersut saqqummiukkaluarutsigik, avaleraasartuut qassiugaluarnersut aappaagu nunatta imartaanut anngutissagaluarnerusut, mittarfiit qassiugaluarnersut nuna kaajallallugu qassiugaluarnersunik mittarfiliortoqarniarnersoq

apeqqutaatinngit aningaasaqarnikkut tunngaviumik ajornartorsiutigut qaangernaviangilagut. Innuttaasut akornanni naligiinnerulernissaq suli pisariaqartinneqarpoq. Inuit Ataqtigiinni isumaqarpugut aningaasanut inatsisissamut siunnersuutigineqartup oqallisiginerani siunissaq kissaatigisarput qitiutittariaqartoq, tamannalu aningaasaqarnikkut pissutsit piviusorpalaartumik aallaavigalugit pissasoq.

Aalajangiisarnitsinnilu inuit eqqorneqartussat qitiutittuarnissaat puigunngisaannassavarput. Sunaluunniit soqanngikkaanni piviusunngornaviangilaq. Assersuutigiinnarlugu namminersortut amerlisarniarutsigik tamassuma oqaatigiinnarnissaa naammanngilaq. Takorluukkavut piviusunngortillugit pisariaqarpugut. Taamatut oqarnerup tunuliaqutarisaa, tassaasoq suliassarujussuaq, paasissallugu pisariaqartipparput. Taamatullu tamatta allatut nutaamik eqqarsalernissarput pisariaqartittuassavarput.

Qitornatta alapernaasernertik isumassarsisarnertillu qanoq atussallugit meeqqat atuarfianni ilinnialereertariaqarpaat. Aammalu aporfissanik naapitsinerminni uteriiserlutik iliuuseqarsinnaanertik ilinniassavaat. Inuusuttortavut aningaasaqarnerup sunaananerik ilisimasaqarnerulersinneqartariaqarput. Namminersortut meeqqat atuarfiannik inuusuttullu ilinniarfiinik annertunerujussuarmik suleqateqateqartariaqarput, aallarniinarlunilu suliniutigisanut qinikkat annertunerujussuarmik tapersersuisariaqarput.

Assersuutigalugu takornariaqarnerup ineriartortinnissaa eqqaasinnaavarput, illoqarfilli annerit avataanni – takornarianik ornikkusunneqartartuni – aallarniillutik pilersitsiniartut aningaaliisussaaleqineq aporfigisarpaat. Pilersaarutit annertuut pingaartikkajuppavut aallarnerusuttullu annikinnerusut sumiiffinni pingaaruteqartut puigugajuttarlugit.

Tamassuma saniatigut ingerlatsiveqarfiit tamakkiisumik ilaannakuusumilluunniit pisortanit pigineqartut oqallisigineqarnissaat pisariaqarpoq. Qanoq inissisimassappat? Ingerlatsiveqarfiit namminersortut annikillioortinneqarsinnaagaluarpataluunniit qanorluunniit isertitaqarsinnaanerpaq anguniartuassavaat? Imaluunniit siunissami allatut inissisimassappat? Nammineerluta pigisarput, Royal Greenland, unammillerneqalermat Uummannami Upernavimmilu qalerallit tulaannerini akit qaffassimasut takusinnaavarput.

Tamanna sumiiffinni taakkunani aalisartunut ilaqutaannullu iluaqutaalluarsimavoq. Aappaatigullu pissutsit taamaattut eqqarsaatersornartitsipput. Ima paasineqassanerpa tulaassuinermut allanik periarfissaqannginnera patsisigalugu ingerlatsiviup nammineq pigisatta ukiorpassuarni aalisakkat annikippallaamik akilertarsimagai aalisartut allanik periarfissaqanngeriarmata? Piginnittutut isigalugu tamanna ingerlatsiviup sinneqartooruteqarnissaanut akuuvoq, aperisariaqarporli tamanna inuiaqtigiinnut pitsaanerpaanersoq? Aaqqissuusseqqinnissat oqallisigineqartarnerisigut ingerlatsiveqarfiit pisortanit pigineqartut pineqaleraangata oqallisiginissaat avaqqunniartarparput, nalunnginnatsigumi oqallisigissallugit imaannaangitsuusoq.

Ingerlatsiveqarfiit suliffeqarfittut annertuumik tunniussisarput, innutaaqatitsinnullu ikinngitsunut suliffissanik periarfissiillutik, tamannalumi nunannaarutigaarput. Taamaattorli akisussaaffeqarluta piginnittuuniarutta inissisimanerisa oqallisiginissaat avaqqussinnaanngilarput. Taamaammallu Naalakkersuisut ingerlatsiveqarfiit pisortanit pigineqartut pillugit ukiumoortumik nalunaarusiarisartagaat oqallisigisarunnaaratsigu Inuit Ataqtigiinni uggoraarput.

Allanngineq amiilaarnarsinnaavoq

Aningaasaqarnermut Siunnersuisoqatigiit ukiumoortumik nalunaarusiaat sapaatip akunnera kingulleq saqqummiunneqarpoq. Nalunaarusiaq siornatigutulli

nalunaarusiarineqartartut ersaritsigisumik oqariartuuteqarpoq: inuiaqatigiinnik aqqissuussisimanerput piujuartitsinermik aallaaveqartinneqanngilaq. Isertitavut sipporlugit atuivugut, aningaasaqarnerpullu nammineerluta sunniuteqarfigisinnaanngisatsinnut, soorlu nunarsuarmi niuerfinni aalisakkat pisuussutillu uumaatsut akigitinneqartut, sanngiilluni ingerlavoq.

Taamatut ingerlaneq killormut saatinniarutsigu ilinniagaqarsimasut amerlanerusut, pisortat ikiorsiissutaannik pisartagaqartut ikinnerusut kiisalu pilersaarutinut imminnut akilersinnaasunut avataaniit aningaasaliisussat pisariaqartippagut. Taamaammallu aqqissuusseqqinnerit pisariaqarput. Kisiannili aallartisarnissaat imannaanngitsuvoq.

Aaqqissuusseqqinneq iternga tikillugu paasissagaanni tassaavoq allanngineq. Uagullu inuit allannguisoqarnialeraangat eqqissisimajunnaarajuppugut. Pigeriikavut suunersut nalunngilarput, aggersulli ilisimasaqarfiginngilagut. Tamannarpiarlu pillugu aqqissuusseqqinnissat maannamut aallartissimanngilagut. Suliarsartai ima annertutigaat qaangeruminaatsutut isikkoqarsinnaasarlutik. Oqaatigisariaqarporli arfermik neriaaraanni periarfissatuaq tassaammat oqummiussinnaasat ataasiakkaarlugit nerinissaq. Arlaatigut aallartittariaqarpugut. Utoqqalinersiutit siusinaarlunilu soraarnersiutit allanngortinnissaannut pilersaarutit aallarniinissanut siullertut isigineqarsinnaapput.

Taamaattorli aqqissuusseqqinnissami pisariaqartut annertunerusut – taamaammallu amiilaarnarnerusut – kinguartittuaannavippagut. Oqaloqatigiinnerit allartittariaqalersut Inuit Ataqatigiini isumaqarpugut. Imaannaanngitsussasut piffissamillu atuiffiussasut ilisimareerparput, taamaattumillu maannangaq aallartittariaqarpugut. Tamannarpiq patsisigalugu akileraarnermik aqqissuusseqqinnissaq, inissiaqarnermut aqqissuusseqqinnissaq ikiorsiissuteqarnermullu aqqissuusseqqinnissaq pillugit naalakkersuinikkut oqaloqatigiinnissat uteriiserluta kissaatigisarsimavarput. Atorfillit akornanni pilersaarutit aallartinnissaat, aatsaalli kingusinnerusukkut naggataarutaasumik naalakkersuinikkut oqallisiginissaat tulluartuunngilaq. Taamaalioraluarutta aqqissuussiniarnerit kikkunnit akisussaaffigineqassanersut, taamatullu arlaannilluunniit piviusunngortinnissaannik akisussaaffigineqarusunnatik imaluunniit piviusunngortinneqarusunnatik maanngaannartinneqarsinnaaneri ernumanartuuvoq.

Periarfissat tamanut atuuttut

Suliffissaaleqisut ikilisarnissaat anguniarlugu pilersaarutit ilaasa nutaanik suliffissaqalernissaq siunertaralugu aallartisarnissat pingaaruteqarluinnarpoq. Suliffissalli tassaaginnanngillat pisariaqartinneqartut. Sulisussat aamma sulilernissaannut piareersartittariaqarpagut. Suliffissaaleqineq eqqartorneqaraangat teknikkertaanik oqallinnerit pigajuppud.

Tassani nuttarsinnaanermut aningaasaliissutit, suliffissarsioriaatsit, piginnaassuseqalernissaq sunertaralugu pikkorissaaneri il.il. pineqartarput. Eqqaamasariaqarparpulli oqaaseq "suliffissaaleqisoq" atoraangatsigu inuk pineqartarmat. Suliffissaaleqisut qulequttamik ataatsimik atuilluni nassuiaannarneqarsinnaanngillat. Angut inuusuttoq kisimiittorlu 20-it missaanni ukioqartoq aamma ataataasoq 45-nik ukioqartoq nulialu iluatigisamik suliffeqartoq assigiimmik pisinnaanngilagut. Tamarmimmi suliffisaqarniarlutik nuttartinneqarsinnaanngillat, ilaalumi aamma aatsitassiveqarfinni inuunissaminnut naleqquttuussanngillat.

Tamannarpiq patsisigalugu inuit ataasiakkaarlugit iliuuseqarfiginissaat pingaaruteqarpoq. Sulisinnaagaanni soorunami sulisariaqarpoq – taamaattorli suliffeqanngitsut tamaasa assigiisseqqissaartillugit pineqarsinnaanngillat. Qanorluunniillu isiginiaraluaaraanni suliffissaaleqinerup akiorniarnera nunap immikkoortuini ineriartortitsinernut, inunnik isumaginnermut nukittuumik siunnerfeqarneq meeqqallu atuarfiinut piginnaassuseqarluartunut qanimut attuumassuteqarpoq.

Inuusuttut ullutsinni ilinniagaqaratik suliffeqaratillu inuusut anguniarneri imaannaangitsoq unammilligassarujussuuvoq. Naleqquttumik neqeroorfiginiarutsigik suliassaq imaannaangitsoq nutaaliorlunilu eqqarsarnissaq aqqusaanngitsoorneqarsinnaangillat. Iliuuseqarsimaneq ajornartorsiummik pilersitsisimasoq aniguniarnermi aappassaaneerneqarsinnaangilaq. Suliniutit Timi Asimi-mut assingusut takusarnissaat kissaatiginaraluaqaaq.

Taamatullu atuartitsineri eqaannerusumik iliuuseqartarnissat, soorlu aasaanerani atuarfiit efterskole-nik højskole-nillu annertunerusumik atuinikkut ingerlanneqarsinnaasut takorusunnassagaluarput. Meeqqat inuusuttullu pisariaqartitartik naapertorlugu ilinniartinneqartuaannannginneri tapersorsorneqartuaannannginnerilu isertuussassaangilaq. Piareersarfiit annertusinissaat ajunngilaq, taannali kisiat immikkut isigineqarsinnaangilaq ajornartorsiutinillu tammartitsinaviarani.

Inuit Ataqatigiinni inuiaqatigiinnut takorluugarput tassaavoq inuiaqatigiit ersoqatigiinneq ataatsimoornerlu toqqammavigalugit ingerlasut. Amerlanerussuteqartut nukittuut qimuttuusinnaangippata siumut ingerlasinnaangilagut. Taamatullu takorluuinerput naalackersuinikkut tulleriiaarinitsinni toqqammaviujuarpoq. Innuttaasut amerlavallaat inuttut ajornartorsionertik imaluunniit meeqqat atuarfianni naammassisamikkut amigaateqarnertik tunngavigalugit namminersortutut aallarniiniarnerit sulisussallu piukkunnaateqarluartut pilersissinnaangilagut. Aningaasaqarnerput siusissukkat katsorsarneqarnissaminik pisariaqartitsivoq.

Sapaatip akunnerini tullinnguuttuni makku immikkoortillugit eqqartortussaavagut:

Amigartooruteqarnerup aningaasaliinerillu ataqagiinnerat misissuiviginiarparput – aningaasat eqqortumik atorpavut?

Naalackersuinikkut kissaatigisat aningaasaqarnikkullu pissutsit piviusut ataqatigiinnerat misissuiviginiarparput – aningaasaliissutissatut pilersaarutaasut inuiaqatigiinni pisariaqartinneqavissunik toqqammaveqarpat imaluunniit qineqqusaarutaaginnarpat?

Mingutsitsinaveersarnek tunngavigalugu aningaasaliinissat uuliamik atuinermik taartaasussat tulleriiaarinitsini sallitinniarpagut. Taamaaliornek aningaasaqarnermut avatangiisinullu iluaqutaassaaq. Mingutsitsinaveersaarnertut kiinnernek takornariaqarnermut allatigullu inuussutissarsionernut iluaqutaassasoq upperaarput.

Sanaartorneq eqqarsaatigalugu ulluunerani paaqqinnittarfiit, atuarfiit inissiallu allanit sallitullugit iluarsaanneqarnissaat tulleriiaarinitsini suilliunniarparput.

ICC-mut tapiissuteqarnikkut, tusagassiorfinnut tapiisarnerup eqquteqqinneratigut kiisalu arlaanut pituttorani ilisimatusarsinnaanermut immikkoortitat NGO-nit qinnuteqarfigineqarsinnaasut amerlinerisigut tamat oqartussaaqataanerat nukittorsarniarparput.

Naalackersuisoqatigiit ilinniartitaanikkut kinguaattooqqaneq iliuuseqarfiginiarlugu Piareersarfiit isumalluutigineqarnerat immikkut oqaluusererusupparput.

Naalackersuisoqatigiit inuussutissarsiutinut tapersiinerit tapiissuteqarnerillu tulleriiaarinerat, tamatumani suliniutit annertuut annikinnerusumillu suliniutit mikinerusut qitiutinneqarnerat oqaluusererusupparput.

Tamakku oqaluuserinissaannut qilanaarpugut, tassanilu Inatsisartuni Naalackersuisunilu suleqatigut kisiisa eqqarsaatiginagit, innuttaasulli aamma peqatigalugit oqallinnissat

pingaartillugit. Nunatta ineriartornissaani periarfissat pillugit amerlanerpaat
isummersueqataanissaat neriutigaarput.

Qanortoq oqallilluortoqarili.